

D.R. 16/2016

RANG UNDANG-UNDANG

b e r n a m a

Suatu Akta untuk meminda Akta Pentadbiran Undang-Undang Islam (Wilayah-Wilayah Persekutuan) 1993.

[]

DIPERBUAT oleh Parlimen Malaysia seperti yang berikut:

Tajuk ringkas dan permulaan kuat kuasa

1. (1) Akta ini bolehlah dinamakan Akta Pentadbiran Undang-Undang Islam (Wilayah-Wilayah Persekutuan) (Pindaan) 2016.

(2) Akta ini mula berkuat kuasa pada tarikh yang ditetapkan oleh Yang di-Pertuan Agong melalui pemberitahuan dalam *Warta*.

Seksyen baharu 57A

2. Akta Pentadbiran Undang-Undang Islam (Wilayah-Wilayah Persekutuan) 1993 [*Akta 505*], yang disebut “Akta ibu” dalam Akta ini, dipinda dengan memasukkan selepas seksyen 57 seksyen yang berikut:

“Tindakan bersaling

57A. (1) Jika Mahkamah Syariah di dalam mana-mana Negeri di Malaysia mengeluarkan waran atau saman, mengikut mana-mana yang berkenaan, di bawah mana-mana

undang-undang Negeri itu untuk dilaksanakan terhadap atau disampaikan kepada mana-mana orang yang berada atau dipercayai berada di dalam Wilayah-Wilayah Persekutuan, mana-mana Hakim Syarie boleh mengendors waran atau saman itu dengan menandatangani dan waran atau saman itu boleh dilaksanakan terhadap atau disampaikan kepada orang itu seolah-olah waran atau saman itu telah dikeluarkan oleh Mahkamah Syariah di dalam Wilayah-Wilayah Persekutuan mengikut peruntukan Akta ini.

(2) Jika Mahkamah Syariah di dalam Wilayah-Wilayah Persekutuan mengeluarkan waran yang memberikan kuasa untuk menangkap mana-mana orang atau saman yang memanggil mana-mana orang supaya hadir di suatu Mahkamah Syariah, dan orang itu berada atau dipercayai berada di dalam Negeri lain di Malaysia dan waran atau saman itu dilaksanakan terhadap atau disampaikan kepada orang itu mengikut mana-mana undang-undang Negeri itu, waran atau saman itu hendaklah, bagi maksud Akta ini, disifatkan telah dilaksanakan atau disampaikan dengan sewajarnya seolah-olah pelaksanaan atau penyampaian itu telah dilaksanakan atau disempurnakan di dalam Wilayah-Wilayah Persekutuan.

(3) Jika Mahkamah Syariah di dalam mana-mana Negeri di Malaysia membuat suatu perintah atau penghakiman di bawah mana-mana undang-undang Negeri itu terhadap seseorang dan orang itu berada atau dipercayai berada di dalam Wilayah-Wilayah Persekutuan, Hakim Syarie, jika dia berpuas hati bahawa perintah atau penghakiman itu telah dikeluarkan dengan sewajarnya oleh suatu Mahkamah Syariah yang berwibawa di dalam mana-mana Negeri di Malaysia, boleh mengendors perintah atau penghakiman itu dan perintah atau penghakiman itu bolehlah dilaksanakan atau disampaikan, mengikut mana-mana yang berkenaan, seolah-olah perintah atau penghakiman itu telah dikeluarkan dengan sah oleh mana-mana Mahkamah Syariah di dalam Wilayah-Wilayah Persekutuan mengikut peruntukan Akta ini.

(4) Jika Mahkamah Syariah di dalam Wilayah-Wilayah Persekutuan membuat suatu perintah atau penghakiman terhadap mana-mana orang atau suatu perintah yang memanggil mana-mana orang supaya hadir di suatu Mahkamah Syariah dan orang itu berada atau dipercayai berada di dalam Negeri lain di Malaysia dan perintah atau penghakiman itu dilaksanakan

terhadap atau disampaikan kepada orang itu mengikut mana-mana undang-undang Negeri itu, perintah atau penghakiman itu hendaklah, bagi maksud Akta ini, disifatkan telah dilaksanakan atau disampaikan dengan sewajarnya seolah-olah pelaksanaan atau penyampaian itu telah dilaksanakan atau disempurnakan di dalam Wilayah-Wilayah Persekutuan.”.

Pindaan Bahagian V

3. Bahagian V Akta ini dipinda dalam tajuk dengan memasukkan selepas perkataan “PENDAKWAAN” perkataan “, PENGUATKUASAAN”.

Pindaan seksyen 58

4. Seksyen 58 Akta ini dipinda—

(a) dalam subseksyen (3), dengan menggantikan perkataan “sendiri” dengan perkataan “kecuali hak dan kuasa yang dinyatakan hendaklah dijalankan oleh Ketua Pendakwa Syarie sendiri”;

(b) dengan memasukkan selepas subseksyen (3) subseksyen yang berikut:

“(3A) Hak dan kuasa yang terletak hak pada atau yang boleh dijalankan oleh Ketua Pendakwa Syarie menurut subseksyen (3) hendaklah dijalankan oleh Ketua Pendakwa Syarie sendiri.”; dan

(c) dengan memasukkan selepas subseksyen (4) subseksyen yang berikut:

“(5) Pegawai Penguat Kuasa Agama hendaklah bertindak di bawah kawalan am dan arahan Ketua Pegawai Penguat Kuasa Agama dan boleh menjalankan semua atau mana-mana hak dan kuasa yang terletak hak pada atau yang boleh dijalankan oleh Ketua Pegawai Penguat Kuasa Agama kecuali hak dan kuasa yang dinyatakan untuk dijalankan oleh Ketua Pegawai Penguat Kuasa Agama sendiri.”.

Kecualian dan peralihan

5.(1) Apa-apa waran atau saman yang dikeluarkan, dan perintah atau penghakiman yang dibuat oleh Mahkamah Syariah di dalam mana-mana Negeri di Malaysia di bawah mana-mana undang-undang Negeri itu yang menunggu untuk dilaksanakan terhadap atau disampaikan kepada mana-mana orang yang berada atau dipercayai berada di dalam Wilayah-Wilayah Persekutuan sebaik sebelum permulaan kuat kuasa Akta ini hendaklah, pada permulaan kuat kuasa Akta ini, diuruskan di bawah Akta ibu sebagaimana dipinda oleh Akta ini.

(2) Apa-apa waran yang memberikan kuasa untuk menangkap mana-mana orang atau saman yang memanggil mana-mana orang supaya hadir di suatu Mahkamah Syariah di dalam Wilayah-Wilayah Persekutuan yang dikeluarkan oleh suatu Mahkamah Syariah di dalam Wilayah Persekutuan yang menunggu untuk dilaksanakan terhadap atau disampaikan kepada orang itu sebaik sebelum permulaan kuat kuasa Akta ini, dan orang itu berada atau dipercayai berada di dalam Negeri lain di Malaysia hendaklah, pada permulaan kuat kuasa Akta ini, diuruskan di bawah Akta ibu sebagaimana dipinda oleh Akta ini.

(3) Apa-apa perintah atau penghakiman yang dibuat oleh suatu Mahkamah Syariah di dalam Wilayah-Wilayah Persekutuan yang menunggu untuk dilaksanakan terhadap atau disampaikan kepada mana-mana orang yang berada atau dipercayai berada di dalam Negeri lain di Malaysia di bawah mana-mana undang-undang Negeri itu sebaik sebelum permulaan kuat kuasa Akta ini hendaklah, pada permulaan kuat kuasa Akta ini, diuruskan di bawah Akta ibu sebagaimana dipinda oleh Akta ini.

(4) Apa-apa notis atau permohonan yang diberikan atau dibuat oleh Pendakwa Syarie menurut kuasa yang diberikan di bawah subseksyen 58(3) Akta ibu berhubung dengan prosiding di hadapan Mahkamah Rayuan Syariah yang sedia ada atau belum selesai sebaik sebelum permulaan kuat kuasa Akta ini hendaklah, pada permulaan kuat kuasa Akta ini, diuruskan seolah-olah Akta ibu tidak dipinda oleh Akta ini.

HURAIAN

Rang Undang-Undang ini (“Akta yang dicadangkan”) bertujuan untuk meminda Akta Pentadbiran Undang-Undang Islam (Wilayah-Wilayah Persekutuan) 1993 (“Akta 505”).

2. *Fasal 1* mengandungi tajuk ringkas dan peruntukan mengenai permulaan kuat kuasa Akta yang dicadangkan.
3. *Fasal 2* bertujuan untuk memasukkan seksyen baharu 57A ke dalam Akta 505 untuk memperuntukkan mengenai tindakan bersaling antara Wilayah-Wilayah Persekutuan dengan Negeri-Negeri mengenai pelaksanaan waran dan penyampaian saman.
4. *Fasal 3* bertujuan untuk meminda tajuk Bahagian V Akta 505 untuk menunjukkan skop Bahagian V.
5. *Fasal 4* bertujuan untuk meminda seksyen 58 Akta 505 untuk menjelaskan bahawa Pendakwa Syarie boleh menjalankan semua atau mana-mana hak dan kuasa yang terletak hak pada atau yang boleh dijalankan oleh Ketua Pendakwa Syarie kecuali hak dan kuasa yang dinyatakan untuk dijalankan oleh Ketua Pendakwa Syarie sendiri, dan bahawa Pegawai Penguat Kuasa Agama boleh menjalankan semua atau mana-mana hak dan kuasa yang terletak hak pada atau yang boleh dijalankan oleh Ketua Pegawai Penguat Kuasa Agama kecuali hak dan kuasa yang dinyatakan untuk dijalankan oleh Ketua Pegawai Penguat Kuasa Agama sendiri. Peruntukan ini penting untuk membezakan antara kuasa yang dimiliki oleh Ketua Pendakwa Syarie dan Ketua Pegawai Penguat Kuasa Agama dengan kuasa Pendakwa Syarie dan Pegawai Penguat Kuasa Agama.
6. *Fasal 5* bertujuan untuk mengadakan peruntukan kecualian dan peralihan.

IMPLIKASI KEWANGAN

Rang Undang-Undang ini tidak akan melibatkan Kerajaan dalam apa-apa perbelanjaan wang tambahan.

[PN(U2)3016]